

格魯派不共三願

(一)

格魯聖教增長願文——成就諦實語

出生無餘勝者父，發心重現菩薩相，宏法諸刹諦實力，願增善慧勝者教！
昔於王頂如來前，立誓時號「大心志」，佛等讚嘆諦實力，願增善慧勝者教！
為弘清淨見行規，供奉能仁白晶鬘，賜螺授記諦實力，願增善慧勝者教！
清淨見離常斷邊，清淨修除昏沉闇，清淨行遵佛語修，願增善慧勝者教！
廣求多聞大智者，如聞義修大尊者，迴向教生大賢者，願增善慧勝者教！
了不了義經無違，皆是一人實修訣，定解遮破諸惡行，願增善慧勝者教！
教法三藏之聽講，證法三學之實修，希有智成之行傳，願增善慧勝者教！
外聲聞行寂馴相，內具生圓瑜伽力，顯密妙道順無違，願增善慧勝者教！
因乘所說空性理，配果方便修大樂，八萬法蘊心要精，願增善慧勝者教！

以三士道護法主，怙主毘沙門法王，具誓護法海會力，願增善慧勝者教！
總祈吉祥師壽故，持教賢哲遍大地，護教施主威力洪，願增善慧勝者教！

(二)

值遇三界法王大宗喀巴聖教願文——攝受悲心之歸依施

靜猛曼殊諸佛父，善慧父子傳承師，願皆發起大悲力，令我眾願速圓滿。
願我一切生世中，終不墮落無暇處，恆受大乘四轉身，值遇善慧勝者教。
願密經論意無違，皆是一人所應修，圓滿無誤勝教授，願遇善慧勝者教。
由無垢理所抉擇，無量教中境行果，瞻部六嚴二勝規，願遇善慧勝者教。
見行更互為助伴，智者不狂戒不癡，樂作聖教眾生事，願遇善慧勝者教。
顯密深義圓無誤，曼殊教水所潤澤，速疾能得雙運位，願遇善慧勝者教。
聞思修三不分離，多聞即知為教授，修心要義符正量，願遇善慧勝者教。
無垢正理觀察修，能與專注相系屬，他派所無最勝法，願遇善慧勝者教。
引勝實心善方便，強遮現後諸欲境，修出離心不共法，願遇善慧勝者教。

七重因果自他換，二種教授合併修，發菩提心勝他派，願遇善慧勝者教。
遠離昏沉三摩地，如正量教所宣說，修無分別不共他，願遇善慧勝者教。
億萬智者莫能測，如實見說甚深義，離二邊見更無上，願遇善慧勝者教。
性空緣起互彰顯，分別假立皆有用，龍猛最細二諦義，願遇善慧勝者教。
成就深乘法器規，四部密教總道體，開啓密教無能等，願遇善慧勝者教。
因位生死與中有，轉成道果三身性，速能斷除三有輪，願遇善慧勝者教。
疾道無上乘命根，謂攝風心入中脈，引俱生界勝他宗，願遇善慧勝者教。
現見本心真面目，令彼入於樂空界，善巧方便最增上，願遇善慧勝者教。
唯從最細風心中，現起幻網相好身，餘人未能知少分，願遇善慧勝者教。
真俱生界與幻身，平等和合健行定，剎那證入四身地，願遇善慧勝者教。
此中最快十二年，或僅三載或三品，速得雙運最近道，願遇善慧勝者教。
總願生死一切時，大師妙音師攝受，諸教派中最高峰，常遇善慧勝者教。

(三)

全圓道斷除錯亂願文，深義心要摩尼

諸歸依處盡所有，金剛壇城合一舞，恩師三密諸加持，吉祥垂賜我三門！
如實教誡師悲音，顯密道次深義精，逐日嚐受證悟力，願達地道果彼岸！
生生攝受為長子，承許不變大悲師，養育不斷至成佛，願如子輩繼父業！
上師善慧金剛持，歡喜攝受行者力，不待聞思修劬勞，願速獲抵地道岸！
善慧耳傳中深義，甘露水流滲心中，顯密道次苗芽端，願垂四身妙谷穗！
引菩提心方便觀，現世八法如瘋舞，世間圓滿魔女惑，願出離心車力增！
僅誦儀軌唯景仰，誤認發心應斷除，七因果引無造作，願速熟練菩提心！
錯認細沉為修等，漂流三摩地門處，斷除修習歧路險，願證具量堅固止！
全無作意真心等，執常斷邊為正見，斷惡道險中觀道，願達緣起空雙運！
三身為道扼要無，唯無明顯生次錯，圓次全圓能熟道，願初次第至究竟！
中脈入住融訣無，修風樂煖圓次誤，較彼波羅密道勝，願速攝風入中脈！

無念樂明或空明，誤認俱生樂空非，本性現前俱生樂，願速趣入光明界！
空變面手相好舞，相好天身光明體，究竟二諦無別果，願速獲德雙蓮筵！
如是此間眾智成，未得少分善慧佛，耳傳深義全無誤，願速究竟全圓道！
如是修習違緣息，順緣無難如意成，三處勇士空行友，具誓海會恆勿怠！
開辟雪山聚昔無，經論大車道軌故，文殊舞師扮人形，決定唯有善慧佛。
印藏智者成就師，那由他慧難測度，甚深性與秘密性，顯明如畫唯大師。
心中紊亂諸宗派，大多墮於偏頗時，能以無垢見修行，開示佛道唯大師。
今見師語殊勝教，尤如純金反觀他，誇夸所謂深密者，一切彷彿嘈染聲，
於大師教若生信，雖唯少分亦希有，俱胝梵天福德力，難敵有緣友應思！
是故為於諸生中，唯以文殊師為師，師所開示為教法，應常祈願不離福。
如是樂善摩尼藏，無難能引祈願舟，方便善巧奇妙儀，應於現在勤趨入。
為能廣增遍虛空，有緣士夫福份故，甲喇洛桑絳貝等，眾人出資而制板。
所有善業俱胝日，三願別法熔金光，遍空巡游大吉祥，純金自宗願宏揚！
施主內外違緣息，彼彼所願諸差別，一切生中不捨離，善慧佛位願速得！